

Na osnovu člana 13. stav 2. Zakona o zaštiti i spašavanju ljudi i materijalnih dobara od prirodnih i drugih nesreća ("Slu`bene novine Federacije BiH", broj 39/03), Vlada Federacije Bosne i Hercegovine, na prijedlog Federalne uprave civilne zaštite, donosi

UREDBU

O OSNOVAMA I MJERILIMA ZA UTVRĐIVANJE ZDRAVSTVENE I PSIHOFIZIČKE SPOSOBNOSTI GRAĐANA ZA UČEŠĆE U ZAŠTITI I SPAŠAVANJU I OBUČAVANJU ZA CIVILNU ZAŠTITU

Član 1.

Ovom uredbom određuju se osnove, mjerila i postupci za utvrđivanje zdravstvene i psihofizičke sposobnosti građana za učešće u zaštiti i spašavanju i obučavanju za civilnu zaštitu.

Član 2.

U skladu sa odredbama člana 11., odnosno člana 14. Zakona o zaštiti i spašavanju ljudi i materijalnih dobara od prirodnih i drugih nesreća (u daljem tekstu: Zakon), radnosposobni građani od 18 do 60 godina života (muškarci), odnosno od 18 do 55 godina života (žene) imaju obavezu učešća u zaštiti i spašavanju, a građani od navršenih 15 do 60 godina života (muškarci), odnosno od 15 do 55 godina života (žene) imaju pravo i dužnost obučavanja za učešće u civilnoj zaštiti.

Član 3.

Raspored građana za učešće u zaštiti i spašavanju, kao i obučavanje za učešće u civilnoj zaštiti, vrši služba civilne zaštite općine prema prebivalištu građanina.

Član 4.

Svi građani iz člana 2. ove uredbe koji su zaposleni i koji nisu zaposleni smatraju se zdravstveno i psihofizički sposobni za učešće u zaštiti i spašavanju, odnosno obučavanju za učešće u civilnoj zaštiti, dok se, na način propisan ovom uredbom, ne utvrdi da nisu sposobni za učešće u zaštiti i spašavanju, odnosno u obučavanju za učešće u civilnoj zaštiti.

Član 5.

Građanin koji smatra da zbog bolesti ili drugih zdravstvenih i psihofizičkih razloga nije sposoban za učešće u zaštiti i spašavanju, odnosno za obučavanje za učešće u civilnoj zaštiti, ima pravo da podnese pismeni zahtjev za ocjenu zdravstvene i psihofizičke sposobnosti.

Zahtjev iz stava 1. ovog člana, podnosi se službi civilne zaštite općine koja je građanina rasporedila za učešće u zaštiti i spašavanju, odnosno za obučavanje za učešće u civilnoj zaštiti.

Član 6.

Služba civilne zaštite općine podnosioca zahtjeva upućuje na ocjenu sposobnosti u dom zdravlja prema mjestu prebivališta, odnosno boravišta.

Ocjenu, nalaz i mišljenje o zdravstvenoj i psihofizičkoj sposobnosti građana utvrđuje doktor medicine primarne zdravstvene zaštite (u daljem tekstu: doktor medicine) kod kojeg se pacijent liječi.

Doktor medicine ocjenu, nalaz i mišljenje iz stava 2. ovog člana, utvrđuje na osnovu anamneze, fizikalnog pregleda i medicinske dokumentacije u zdravstvenom kartonu.

Doktor medicine može zatražiti dodatne pretrage i preglede.

Član 7.

Prilikom davanja nalaza, ocjene i mišljenja o zdravstvenoj i psihofizičkoj sposobnosti građanina za učešće u zaštiti i spašavanju, odnosno u obučavanju za civilnu zaštitu, doktor medicine može dati slijedeću ocjenu: sposoban ili privremeno nesposoban ili nesposoban.

Član 8.

Kada služba civilne zaštite općine dobije nalaz, ocjenu i mišljenje iz člana 7. ove uredbe, dužna je donijeti rješenje o sposobnosti građanina za učešće u zaštiti i spašavanju, odnosno u obučavanju za civilnu zaštitu.

Protiv rješenja iz stava 1. ovog člana, može se u roku od osam dana od dana prijema rješenja izjaviti žalba kantonalnoj upravi civilne zaštite.

Član 9.

Kantonalna uprava civilne zaštite, prije donošenja rješenja po žalbi, upućuje žalitelja drugostepenoj ljekarskoj komisiji radi davanja ocjene, nalaza i mišljenja o sposobnosti žalitelja.

Drugostepena liječnička komisija sastoji se od tri člana, i to:

- doktor medicine, specijalista medicine rada,
- doktor medicine, specijalista neuropsihijatar,

– predstavnik kantonalne uprave civilne zaštite.

Komisiju iz stava 2. ovog člana imenuje i razrješava kantonalna uprava civilne zaštite, s tim što doktore specijaliste predlaže nadležno kantonalno ministarstvo zdravstva.

Predsjednik komisije iz stava 2. ovog člana je doktor medicine, specijalista medicine rada.

Članovi komisije iz stava 2. ovog člana ne mogu biti osobe koje su donosile prvostepenu ocjenu o sposobnosti.

Član 10.

Kantonalna uprava civilne zaštite donosi rješenje o sposobnosti građanina za učešće u zaštiti i spašavanju, odnosno u obučavanju za civilnu zaštitu na osnovu ocjene, nalaza i mišljenja drugostepene komisije.

Rješenje kantonalne uprave civilne zaštite doneseno po žalbi je konačno.

Član 11.

Građanin kod kojeg je došlo do promjena u zdravstvenom stanju ili psihofizičkoj sposobnosti, ima pravo podnijeti zahtjev službi civilne zaštite općine radi utvrđivanja sposobnosti za učešće u zaštiti i spašavanju, odnosno u obučavanju za civilnu zaštitu.

Zahtjev iz stava 1. ovog člana može podnijeti i služba civilne zaštite, odnosno službe za upravu općine ili pravno lice kod kojih je građanin raspoređen za učešće u zaštiti i spašavanju, radi ponovnog kontrolnog zdravstvenog pregleda.

Po zahtjevu iz st. 1. i 2. ovog člana, postupa se na način predviđen u čl. 5. do 10. ove uredbe.

Član 12.

Troškovi koji se odnose na pribavljanje nalaza, ocjene i mišljenja iz člana 7. ove uredbe, plaća služba civilne zaštite općine na osnovu fakture doma zdravlja koji je izvršio ocjenu sposobnosti građanina.

Služba civilne zaštite općine može sa domom zdravlja zaključiti ugovor o načinu plaćanja troškova iz stava 1. ovog člana.

Troškove rada drugostepene ljekarske komisije snosi kantonalna uprava civilne zaštite, ako je žalba osnovana, odnosno žalitelj, odnosno žalitelj ukoliko žalba nije osnovana.

Član 13.

Danom stupanja na snagu ove uredbe prestaje primjene svih propisa kojima su na području Federacije Bosne i Hercegovine bila uređena pitanja koja se odnose na određivanje osnova i mjerila i postupak za utvrđivanje zdravstvene i psihofizičke sposobnosti građana za učešće u civilnoj zaštiti i obučavanje za civilnu zaštitu.

Član 14.

Ova uredba stupa na snagu osmog dana po objavljivanju u "Službenim novinama Federacije BiH".

V broj 127/04
15. aprila 2004. godine
Sarajevo

Premijer
dr. **Ahmet Hadžipašić**, s. r.